

LE MANIFESTE  
DE MONSIEVR LE  
PRINCE, ENVOYEE A  
Monfieur le Cardinal de  
Ioyeufe.

9

*Ensemble la lettre de Monsieur de  
Boüillon , enuoyee à Madame  
de la Trimouille.*

---

M. DC. XIV.

THE MOUNTAIN

THE MOUNTAIN

THE MOUNTAIN

THE MOUNTAIN

THE MOUNTAIN

THE MOUNTAIN

THE MOUNTAIN

THE MOUNTAIN

THE MOUNTAIN

MONSIEUR,

Le bien que i'ay receu de parler à vous, le iour deuant que ie partis de Paris, me cōfirma en la creance que i'ay, que vous affectionnez le seruice du Roy, le bien du public, & le repos de la France, ce qui me fait vous aduertir des difficultez qui pourroient empescher vos loüables intentions vous sçauiez les affaires du dedans & du dehors de ce Royaume, les vnes en confusions & desordres, les autres sans reputation ne erreurs, accidents coutumier en la minorité des Roys, & en quoy la bonté de la Roynes à pourueu tant qu'il y a esté possible: assistees neantmoins de personnes dont les Conseils ont esté de replaster & racommoder au lieu que par l'assemblee des Estats generaux, il falloit redresser le grand bastiment de ceste Monarchie, de laquelle Monsieur le Prince de Condé, autres Princes & Officiers de la Couronne, ont tant aprehendé la ruine qu'il se sont assemblees par le commandement de la Roynes, en presence d'aucuns de ses particuliers seruiteurs, pour maintenir l'autorité de leurs Majestees, & le bien du public conference continuee iusques à ce que la crainte de perdre l'autorité des vns & l'am-



bition d'autres, calomniant les Princes, fi-  
 rēt croire à la Royne qu'elle ne deuoit plus  
 permettre leſdites aſſemblees, & parce qu'el-  
 len'en fiſt demonſtration, ils les continue-  
 rent quelque tēps pour ſeruir le Roy, & à la  
 France, encore qu'ils ſe viſſent eſloignez  
 de toutes communications des affaires, &  
 meſmes du rang qui leur appartenoit aux  
 Conſeils ou leurs aduis n'eſtoient ſouuent  
 ny demandeés ny ſuyuis. Leur particulier  
 ne leur eſtoit rien au pris du general, pour  
 eſuiter que la proximité du dāger, que ceſte  
 confuſion ne fit n'eſtre la guerre, ils delibe-  
 rerent de faire des remonſtrāces & des plain-  
 tes à la Royne, & luy deſcouvrir la verité, &  
 ſources des deſordres, la ſuppliant dy pour-  
 uoir par la tenuē des Eſtats generaux. Reſo-  
 lurent premierement d'en communiquer  
 aux Agents de l'Eſtat, leſquels ils recogneu-  
 rent ſi eſloigees qu'ils leurs imputoient à cri-  
 me ſeulement d'en parler, ayant le particu-  
 lier beaucoup plus de force enuers eux que  
 le general, ce que voyant, & que meſmes il  
 y auoit du peril pour eux, de propoſer à ſa  
 Maieſté la reformatiō de l'Eſtat, aſſiſtees de  
 ceux qui vouloient regner dēs la confuſion,  
 mauuais interpretes de leurs bonnes inten-  
 tions, conſulterēt s'ils doiuent arreſter Mon-  
 ſieur de Bouillon, & parties de ſes Princes,

dequoy estant aduertis ils se preparerent de sortir de la Cour, cognoissant que la liberte de parler leur y estoit deniee, & les mauuais conseils, continuās qu'ils seroient participās au mal qui en prouiedroit, & en quoy on les vouloit rendre responsable: Ils sortirent les vns apres les autres, par permission & avec congé de la Royne, sortie fort differente de tous ceux qui ont voulu prendre les armes, desquelles l'on a aussi tost veu l'esclat que le depart, veux au contraire avec leur train seulement, & pour ne donner aucun soupçon, se voyent à Mezieres, ils ne sont si tost partis que l'on faict courir des faux bruits qu'ils sont mal contens, qu'ils veulent prendre les armes. Monsieur de Vendosme est arresté prisonnier, Monsieur de Longueuille contrainct de se retirer la nuit, ce qui sert de responce à ceux qui disoient qu'ils ne deuoient partir de la Cour pour faire leurs remonstrances, l'on arme contre des gens, desarmes les Suisses, la caualleries, les regimēs sont mandees, l'on met en garnison les cheuaux legers, on donne des commissions des recrues, gens sont encores aux ville avec vn commandemēt par escrit, de nourrir à personne sous lequel estoit compris les Princes, Gouverneurs de Champagne: l'Isle de France, & Picardie, non contēs dec e, la Vieff-



uille commande de fermer les portes de la citadelle, à Monsieur de Neuers, Gouverneur de Champagne, qui estoit veritablement, luy fermer les portes de sa maison, laquelle est enclose dans ses fortifications, Desreaux Lieutenant de la Vieuille en la citadelle de Mezieres, au lieu d'obeyr & reuerer la personne du premier Prince du Sang, contre toutes les loix d'obeyssance, vsitee en ce Royaume, leur mande qu'ils ne s'aprochent point de la citadelle, qu'il ne les laisseroit point entrer, menasse de les tirer, renforce la garnison de Vallons estrangers, recoit des memoires par lesquels la Vieuille luy promet secours: Le deuoir de Monsieur de Neuers estoit dy faire obeyr le Roy, d'empescher le danger, & faire chastier exemplairement les rebelles, sa resolution, & celle de ses amis estonne les mutins, qui luy rendent la place, esquiuant par sa valeur le piege que ses ennemis auoient tramé a toutes ceste assemblee, il aduertit sa Majesté de cet heureux succez, s'offre d'obeyr à ses commandement, Monsieur le Prince escrit à la Royne luy monstre les desordres qui sont en ce Royaume, luy supplie qu'il luy plaise dy pouruoir par l'assemblee des Estats generaux? Mais quoy cest estre criminel que de demander la reformation,

ceux qui en sont ennemis , qui ne veulent rendre compte de leurs maluerfatiōs , crient aux armes, & à la guerre , veulent rendre ces Princes odieux au peuple, & criminels auant que d'estre ouïs, Princes de qu'elle maisons? de France, de Neuers, de l'Orraine, & d'Orleans , apparentees à tous les Empereurs, Roys , & Princes de l'Europe , on y traite avec les estrangers, on y fait des leuees, on a mis les mains sur les deniers Royaux , y a-il esté pris des instructiōs ou memoires qui les accusent , y a-il vne seule apparence qu'ils ayēt offensé leurs Majesté, ny en paroles ny en effects, est-ce débattre du pouuoir de l'auctorité de la Royne , puis qu'ils recourent à elle pour y mettre l'assemblée des Estats généraux , au contraires n'est-ce pas la confirmer, sa Majesté escrit du 13. Feurier aux Gouverneurs des prouinces qu'elle à appris que les Princes auoient quelque mescontentement , qu'ils ont eu part aux gratifications, que les affaires de France sont en bon estat, que sa Majesté enuoye le Sieur de Vâtadour pour ramener lesdits Princes à la Cour , & que par conseil il est trouué à propos de faire vne conuocation des principaux des Ordre & Estats de chacune prouince de ce Royaume , fait commandement aux habitans des villes , de faire garde & ne laisser entrer per-



sonne, les plus forts dans les villes, cette lettre est de ceux qui craignent les recherches, & de perdre, leurs autorités ou de ceux qui veulent porter le tout à l'extrémité, veulent faire seuremēt croire que les Princes ne sont poussez du bien general, ains de leurs particuliers, en quoy ils ont bien fait paroistre le contraire, par la lettre que Monsieur le Prince a escrite à la Royne, que tāt s'en faut qu'ils demandent quelque chose pour eux, qu'ils offrent de remettre toutes leurs pensions & ce qu'ils ont eu, s'ils est de besoin pour servir au public: Le defaut de l'Estat des affaires est représenté par la mesme lettre, & iusque aux moindre: ils voyent & recognoissent ce qui en est, qu'elle apparence y a-il que les Princes retournent à Paris, vn deux a esté mis prisonnier, on s'efforce de faire declarer les autres criminels, les armes leuees, les compagnies mandees, contre qui? que contre-eux, puisque la guerre n'est pas avec les Espagnols, Anglois, ny avec ceux de la Religion, qu'elle seureté pour eux, à quel propos faire vne si grande despence, & prodiquer les finances du Roy, tant necessaires, ailleurs pourquoy allarmer en toute la France? quel danger? quel peril, auquel on met cet Estat? combien de gens qui ne demandent que troubles, que profiter de la guerre pourront entre-



entreprendre, se faisir de villes & de places, sans aucun adueu, & seulemēt parce que l'on crie armes & guerres, lors que ses Princes ne demandent que la paix & restauration & reformation de l'Estat, que feroient les Princes s'ils n'estoient asseurés de leurs integritees, ces preparatifs, ces Suisses, ses armes ne les obligeroient elles a prendre garde à eux, & à s'armer non contre le seruice du Roy, mais pour se deffendre contre leurs ennemis, & de ses mauuais conseillers, & s'armants, c'est entrer en soupçon, & ne faut qu'une estincelle pour embrasser la France, c'est pourquoy ils veulent plüstoit courir à tous perils que de leuer aucunes armes, si ce n'est autant que la necessité les y contraigne: Pourquoi ses armes leuee? est-ce pour le petit nombre de personne qui autant ambitieusement qu'impudemment menacent & veulent faire craindre les Princes, lesquels par heredité tiennent de leur predecesseurs, de faire peur à tous les autres assemblees contre la France, de penser reformer l'Estat par vne assemblee de personnes choisies par les prouinces. C'est vn aduis & conseil tres pernicioeux, inuention trouuee pour estouffer l'ancien remede des maux de la France, qui se regloient par les Estats generaux, c'est donner à cognoistre au peuple que l'on

leur veüt oster leurs priuileges, libertees,  
 franchises, & secours, & establir vne forme  
 à l'aduenir, pour maintenir les desordres,  
 election choisies dans les prouinces de per-  
 sonnes qui ont intérêt à la continuation des  
 confusions, qu'elle force? quels pouuoirs?  
 auront-ils d'autoriser les propositions de  
 leurs Majestés, ny celles qui seront necessai-  
 res pour la reformation de l'Estat. Veut-on  
 représenter à trente personnes ce qu'ils faut  
 que trois cents deliberent? Le general de  
 la Frâce ne cognoistra-il pas que cest vne as-  
 semblee affectee, & que se sont des person-  
 nes choisies pour maintenir ceux qui gou-  
 uernent aux maluersations passée, pour avec  
 leur replastrement accoustumé, perdre la  
 reputation de la France, saccager le peuple  
 sans consideration, ne cognoistront-ils que  
 c'est le cousteau qui coupe la gorge à l'as-  
 semblee des Estats, par vn establissémēt d'v-  
 ne nouuelle forme inusitee, excepté celle  
 de Rouën, de laquelle il ne vint aucun fruit,  
 & quelle liberté conuoquer vne assemblee  
 suspecte entournee d'armes? & à quel pro-  
 pos les armes, & quāt ainsi seroit, que soubz  
 des subiects ils eussent contraincts les Prin-  
 ces à se deffendre, que mesmes ils les eussent  
 opprimees & despoüillees de leurs places,  
 Dieu est pour eux, leur cause iuste, leur ex-

tration & la grandeur de leur maisons seroit bastante pour en iuste deffence troubler le repos general de toute la France, Monsieur, & ne sont icy les remedes salutaires, ce n'est pas esteindre le feu du desordre, cest y ietter de l'huile, cest approcher si pres le fer du fer, d'où pourroient sortir des esteincelles qui m'estoient le feu par tout, vous estes grand de qualité de reputation & de bonté vous tenez les premiers lieux en cét estat, au nō de Dieu, suppliés la Royne de ne croire les mauuais cōseils, & d'accorder l'assemblees generale, seure & libre des Estats, desarmer & renuoyer les compagnies en leurs maisons, ne laisser entrer les estrangers, à ce que tous ensemble, sans autre armée, que l'authorité Royale, pieté des gens d'Eglise, fidelité de la Noblesse, & bonté du peuple, l'on pouruois à la reformation de l'Estat, & à la gloire de Dieu, au seruice du Roy, & bien public.

---

*Lettre de Monsieur de Bouillon, à  
Madame de la Trimoüille.*

**M**ADAME j'ay receu vostre lettre par le sieur Chauueau, & entendu sa creance par ou vous me dites de trauailler,



ce qu'on donne contentement à la Royne, sur la citadelle de ceste ville, ie desire fort qu'un chacun sçache & considere la conduite qu'on y apporte, si sa Majesté mesme se veut donner le loisir, ie m'asseure qu'elle cognoistra combien de respect & d'obeyssance on luy veut rendre: Et que la vehemence des Conseils de ceux qui veulent dans le malheur de l'Estat, courir ceux qu'ils peuvent meriter ont fait naistre les difficultez qui s'estoient presentee en cest affaire, ie ne vous allegueray pas les preparatifs faits pour s'armer, les deffiances jettees dedans & dehors le Royaume, de tous tant que nous sommes de deça, non les gardes ordonnees, l'assurance que ie laissay à Paris, qu'icy on s'assembla sans troupe ny armes, qu'estant assemblez, on ne sçauoit ce qu'on vouloit, & les causes de nos desparts de la Cour, dans lesquelles i'asseurois qu'il ny auoit rien contre l'autorité de leur Majestez, de leur seruice, de la tranquillité de l'Estat, les voicy arriuez, la citadelle est fermee, memoires sont faits à des Gētils-hommes qui portent l'ordre de ce refus, il paroist vne disposition à les secourir, enquerir des moyēs dy receuoir de la cauallerie, on s'enquiert soigneusement de ceux de dedans, s'ils auoient commandement de faire ce

qu'ils faisoient, pour ( s'ils en eussent eu) ne proceder aucunement à les en tirer, mais se plaindre & attendre la raison qu'on en eust voulu faire, de tout cecy ie ne me veux seruir pour blasmer les Conseils, encor qu'il y eust bien lieu de ce faire, non plus qu'à faire seruir les choses à fortifier les raisons de n'auoir peu receuoir, vn Lieutenant des Gardes dans la citadelle, ains seulement de ce qui suit, Monsieur de Neuers enuoye le Cheualier de la Crossebes à la Royne, l'aduertit de ceste desobeissance, l'asseurer comme il poursuiuoit dy faire obeir le Roy, & dy receuoir & executer ses commandemens, ledit Cheualier donne la lettre, expose la creance conforme, & encore plus exprets, la donne par escrit, ceux de dedans sortent, on en aduertit, & Monsieur de Neuers rafraischit les mesmes assurances, au lieu de les receuoir, on fait partir sur les despesches de la Brosse de la cauallerie, pour si la citadelle n'estoit renduë, aduiser d'assister & encourager ceux de dedans, on enuoye Monsieur de Pralin qui a aduoüé la desobeissance, on despesche quantité de Commissions, on prepare l'artillerie. La Royne dit qu'elle meine le Roy avec elle pour se faire obeyr, pourquoy celà? puis que l'obeyssance est offerte, deuant & depuis la prise,

n'est-ce pas effacer la cause de ceste obeyssance, qui aura vn effect sur le deuoir que volontairement Monsieur de Neuers rendoit au Roy, & au contraire la laisser attribuer à ces batteurs d'estrade, au leuement des forces, & qui plus est tout cela à la veüe des faces couronnées de leurs Majestez: Puis que l'on asseuroit, la redition n'estoit-elle pas à estimer, & leur brasser non seulement pour la place, mais pour donner ceste bonne nouuelle au Royaume, imbu au contraire, & à leurs Majestez, ceste preuue que les Princes ne veulent ny ne pensent qu'à obeyr & seruir à leurs Majestez, cela repugnoit aux causes de l'armement, ouuroit le chemin à la conscience & au reproche, mais il portoit du soupçon à ceux qui ont besoin de se cacher & authoriser dans les diuisions, ainsi donc on n'a voulu receuoir vne obeyssance libre on la voulu forcer, on la demande avec soupçon & apparence, quelle soit ruineuse en la tournant comme la feureté de tant de personnes de qualité qui sont icy, fortifiants le dire qu'on faict par peur, & par deuoir les choses qui sont requises. Cela receu par ceste main, on eust faict demander vn autre, puis que les menasses en auroient esté la cause les raisons de s'armer par c'est exemple fortifie, & la poursuite de nos rui-



nes, conclu entre ceux qui estiment ne profiter de celles de l'Estat que les nostres n'ayent precedé, quoy ils ont raison ny ayans rien au restes des subiects du Roy, personnes plus interessées que ce qui est icy à son service, on dit obeyssées, nous le voulons, mais on ne veut pas laisser voir que le faisons parce que nous le deuons, ains qu'on nous y a forcez par les funestes volontaires, & non necessaires armes, qui feront plus d'oppositions que de rappeler des personnes à leur deuoir, que la Majesté de nostre Roy sçache qu'à ceux qui la cognoistront, qu'un chacun soit rappelé aux places qu'on doit tenir, que les maux de l'Estat soient cogneus les remedes apprestez, les bouches librés à leur dire & communiquer, qu'on ne subtilise par qu'il les ouuertures en soyent faites, puis que sans violence elles se fait, & qu'à ces remedes il ny apparroist rien de nouueau, rien qui n'aye esté souuent tres-vtile à la France, qu'on oste les armes, & que par la iustice, armes de l'authorité Royale, chacun soit maintenu en son deuoir: Nous n'auons point d'armes, seulement vne raisonnable preuoyance de n'estre commis à la vehemence des armes, en des conseils de ceux qui ont pour but de leur fortune nostre ruine: Ainsi non la citadelle de Mezieres sera soubsmise, mais nos personnes & nos biens. Ma-

dame, nul autre plus que moy ne plaint le mal que ie voy, & n'a moins de visé à y cognoistre le profit, le mal n'est point d'icy, pouuant asseurer qu'on ne veut que le repos & obeyr, & redis que tout ce que l'on desire, & desirera se trouuera dans les limites de l'autorité Royale & à la paix de l'Estat, mais si l'on continuë à vouloir commencer par nous pour affoiblir ces choses, nous nous y opposerons comme bons François, on pren plaisir à me blasmer, i'en fais gloire mes actions feront preuue de mes intentiōs, le mal n'est point d'icy encore vn coup, on a escrit ce qu'on a iugé cōuenir aux affaires, on dit qu'on accepte les Estats, que n'aduise-on à conuenir de l'Estat, ou on demeurera entre cy & là, & des choses qui doiuent estre preparees pour la seureté, & possible que Dieu nous rendroit tous si sages que nous tomberions d'un mesme aduis, à faire les choses que les Estats pourroient faire, moyë si le pouuois tenir qui seroit pour se terminer au contentement de tous, d'estimer que les armes demelassent ceste fusée c'est errer en fait & en droit, ie sçay que c'est, cest pourquoy i'en parle si hardiment & asseurement, Dieu en ordōnera sa volōté, & s'il luy plaist ie la suiuray avec honneur, Madame tenez moy pour

*Vostre tres-humble & tres-*  
*affectionné seruiteur.* BOVILLON.